

Kembali ternak patin meskipun rugi



ROSMAWATI Sulaiman (kiri) dalam proses memulakan kembali perusahaan ikan patin sangkar miliknya yang sebelum ini terhenti berikutan air sungai kering.

UM 30 03/11/23 MIS

29

MARAN: Memandangkan permintaan terhadap ikan patin masih tinggi, pengusaha ikan sangkar di Chenor di sini tekad meneruskan kembali penternakan miliknya yang terhenti dua bulan lalu.

Bercakap kepada *Utusan Malaysia*, pengusaha ikan sangkar di Kampung Tanjung Berangan, Pesagi, Chenor, Rosmawati Sulaiman, 41, berkata, sebelum ini, perusahaannya terhenti berikutan air sungai kering sehingga mengalami kerugian besar.

“Kini, saya dan suami mengambil keputusan untuk memulakan kembali perusahaan kami kerana melihat air Sungai Pahang sudah kembali kepada normal,” katanya di sini semalam.

Rosmawati berkata, walaupun musim kemarau sudah berlalu, namun, penternak ikan patin akan terus berdepan dengan lain-lain risiko, tambahan

pula musim Monsun Timur Laut (MTL) akan tiba tidak lama lagi.

Katanya, kualiti air sungai yang semakin berkurangan menjadi satu daripada punca anak ikan patin mati atau tidak dapat membesar dengan baik.

“Saya lihat kualiti air Sungai Pahang sudah tidak lagi seperti dahulu dan perkara ini turut diakui oleh rata-rata penternak ikan patin sangkar di Maran dan Temerloh.

“Tambahan pula dengan keadaan cuaca yang tidak menentu kini akan menyebabkan air sungai kadang kala menjadi terlalu berlumpur atau terlalu keruh sekali gus mengganggu pembesaran ikan,” katanya.

Menyentuh tentang kos penyelenggaraan pula, Rosmawati berkata, tidak dinafikan, kebanyakan harga barangan kini semakin mahal.